

28 AUG 1998

Tajol-Pendatang

PENGAMPUNAN PENDATANG ASING TANPA IZIN SEMPENA MERDEKA

KUALA LUMPUR, 28 Ogos (Bernama) -- Perdana Menteri, Datuk Seri Dr Mahathir Mohamad hari ini bersetuju mengadakan program pengampunan selama dua bulan bagi membolehkan pendatang asing tanpa izin yang berada di negara ini pulang ke negara asal mereka.

Timbalan Menteri Dalam Negeri, Datuk Tajol Rosli Ghazali berkata selaku Menteri Dalam Negeri, Dr Mahathir membuat keputusan itu atas perakuan Jabatan Imigresen dan sempena sambutan Hari Kebangsaan ke-41.

"Tempoh pengampunan bermula pada 31 Ogos hingga 31 Oktober ini," katanya pada satu sidang berita di sini.

Menurut Tajol, pendatang asing tanpa izin yang menerima tawaran pengampunan dimestikan menguruskan dokumen perjalanan masing-masing dan semua perwakilan asing yang terlibat hendaklah memberi kerjasama mengeluarkan dokumen perjalanan kepada warganegara mereka.

Mereka tidak perlu pergi ke Jabatan Imigresen di mana-mana sekalipun untuk mendapatkan Memo Periksa Keluar atau Pas Khas untuk keluar.

Mereka hanya perlu bersedia dengan dokumen perjalanan dan tiket perjalanan sahaja dan boleh keluar dari mana-mana pintu keluar, kata Tajol.

Pendatang asing tanpa izin terbabit juga tidak akan dikenakan sebarang tindakan kompaun di bawah Akta Imigresen bagi kesalahan seperti masuk dan tinggal secara haram, tinggal lebih masa atau mereka yang masuk atas visa yang diragui ketulenannya.

Menurutnya butir-butir peribadi pendatang asing tanpa izin yang meninggalkan negara di bawah program ini hendaklah dikemukakan di semua pintu keluar.

Bagaimanapun, kata Tajol mereka yang dikehendaki oleh agensi-agensi penguatkuasa atas kesalahan jenayah tidak akan dibenarkan pulang di bawah program ini.

Program pengampunan ini meliputi semua warganegara asing termasuk tanggungan mereka, khususnya warganegara Indonesia, Bangladesh, India, Pakistan, China, Myanmar dan beberapa negara dari Afrika.

Beliau menggesa semua pendatang asing tanpa izin supaya mengambil kesempatan yang diberikan kerajaan untuk meninggalkan negara ini.

"Mereka yang masuk, bekerja atau telah tinggal lebih masa, menduduki kawasan setinggan, penempatan-penempatan tertentu di atas tanah-tanah kerajaan, ladang dan kawasan pertanian patut mengambil kesempatan yang diberikan kerajaan," katanya.

Gerakan penguatkuasaan secara besar-besaran di seluruh negara meliputi kawasan dan tumpuan ini akan dilancarkan selepas tamat tempoh pengampunan ini, kata Tajol.

"Tumpuan utama gerakan ini ialah majikan yang masih menggaji pendatang asing tanpa izin," katanya.

Penerbangan Malaysia (MAS) dan lain-lain syarikat penerbangan serta syarikat pengangkutan seperti feri diminta memberikan kerjasama dengan mengadakan penerbangan atau jadual perjalanan tambahan bagi menyokong usaha murni kerajaan ini, katanya.

-- BERNAMA

YBK oba